

02 SEP 2000

Ling-Suqiu

AMBIL BERAT PANDANGAN PERDANA MENTERI, KATA DR LING

KUALA LUMPUR, 2 Sept (Bernama) -- Menteri Pengangkutan Datuk Seri Dr Ling Liong Sik meminta semua pihak termasuk Jawatankuasa Rayuan Pilihan Raya Persatuan-Persatuan Cina Malaysia (Suqiu) agar mengambi berat pandangan Perdana Menteri mengenai cubaan meniupkan perasaan perkauman di negara ini.

Dr Ling yang juga presiden MCA berkata beliau percaya kenyataan Datuk Seri Dr Mahathir itu dibuat demi kebaikan semua masyarakat serta kestabilan negara ini.

"Saya berharap semua pihak selain kepada siapa yang telah ditujukan (pandangan ini) ambil perhatian berat atas apa yang telah diucapkan oleh Perdana Menteri," katanya ketika diminta mengulas perutusan Perdana Menteri sempena Hari Kebangsaan ke-43 berkaitan isu itu.

Terdahulu, Ling melawat Ekspo Cintai Malaysia di Pusat Pameran dan Perdagangan Mines di Seri Kembangan di sini. Ekspo selama 10 hari itu yang disertai 600 syarikat berakhir esok.

Perdana Menteri dalam perutusan Hari Kebangsaan Khamis lalu berkata bahawa 17 tuntutan Suqiu hampir sama dengan perjuangan komunis di negara ini satu ketika dahulu yang ingin menghapuskan sama sekali hak istimewa orang Melayu.

Dr Mahathir juga berkata pendekatan Suqiu sama dengan kumpulan Al-Ma'unah yang cuba menyakitkan hati orang tertentu supaya perasaan perkauman dihidupkan semula.

Suqiu yang telah menolak pandangan Perdana Menteri telah melahirkan hasrat bagi menemui Dr Mahathir untuk menjelaskan kedudukan sebenar jawatankuasa itu dalam perkara ini.

Dr Ling berkata Malaysia mempunyai masyarakat majmuk pelbagai bangsa, budaya dan agama dan dengan itu semua pihak harus berhati-hati apabila menyentuh sesuatu isu sensitif.

"Kita perlu sensitif kepada perkara-perkara sebegini dan jangan buat kenyataan sebelum meneliti dan menghalusi sesuatu perkara itu," katanya.

Beliau berkata ada perkara yang perlu dibahaskan dalam forum yang sesuai bagi mencari penyelesaian dan bukannya dibahaskan secara terbuka.

"Ada beberapa perkara yang mungkin perlu dibahaskan...tapi ada tempat yang sesuai dengan peserta yang sesuai untuk cari penyelesaian dan bukan secara umum," katanya.

Dr Ling juga ditanya hasrat Suqiu yang mahu berjumpa dengan Dr Mahathir bagi menjelaskan isu itu.

"Ini adalah sesuatu yang baik. Tapi terpulang kepada Perdana Menteri sama ada mempunyai masa untuk berjumpa mereka," kata Dr Ling.

Ditanya adakah perlu Suqiu mengkaji semula tuntutan-tuntutannya, Dr Ling berkata: "Ini terpulang kepada mereka."

-- BERNAMA

RV ZS FAZ